

Kaedi ya Morutabana Beibele ya me ya ntlha

Pholisi

Go tlabologa ga puo go direga fa re tlhoma megopolo thata mo go diragatseng le mo go diriseng dipholisi tse di tshwanetseng tsa puo. Boineelo le go dira ka natla ga barutwana go botlhokwa fa ba tshwanelwa ke go ithuta go bua puo ka mokgwa o o tshwanetseng. Batsadi le barutabana ba rotloediwa go kgatlhegela se barutwana ba se buang kgotsa ba se kwalang gonne go dira jalo go tlaa ba rotloetsa go batla go itse puo. Morutabana o tshwanetse go tthalosetsa barutwana dipoelo tse di solofetsweng tsa thuto nngwe le nngwe.

Dithuto tse di mo bukeng ya morutwana di rulagantswe go ya ka bogolo jwa dingwaga. Mafoko le puo le tsona di nolofaditswe go ya ka bokgoni jwa dikakanyo tsa bona. Morutabana o rotloediwa go buisa kgang yotlhe mo Beibeleng gore a ba letle go tthaloganya kgang yotlhe e go buiwang ka yona.

Tse ke dipoelo tsa dithuto tse di tshwanetseng go fitlhelelwa morago ga dithuto tse:

- Barutwana ba tshwanetse go kgona go bitsa ditumanosi le ditumammogo.
- Barutwana ba tshwanetse go kgona go dirisa matshwaopuiso le kakanyo ya bona ka se ba se buisang.
- Barutwana ba tshwanetse go kgona go dirisa segalo se se farologaneng fa ba buisa.
- Barutwana ba tshwanetse go kgona go tshwantsha dilo mo tthaloganyong ya bona le go akanya ka tsela e e tseneletseng.
- Barutwana ba tshwanetse go kgona go bua kgang e ba ntseng ba e buisa.
- Barutwana ba tshwanetse go kgona go reetsa ka tsela e e tseneletseng.
- Barutwana ba tshwanetse go kgona go buisa ka kelotlhoko le ka tsenelelo.
- Barutwana ba tshwanetse go kgona go buisa ka nepagalo.
- Barutwana ba tshwanetse go kgona go godisa le go oketsa tlotlofoko ya bona.
- Barutwana ba tshwanetse go kgona go bapisa setshwantsho le bokao jwa sona jo bo maleba.
- Barutwana ba tshwanetse go kgona go supa ditshwano le dipharologantsho.
- Barutwana ba tshwanetse go kgona go tsalanya tshedimose tso le e ba e itseng le go e fetisa.

Sala dikaedi morago!

Ditshwantsho tse di fa tlase di thusa barutwana le barutabana go sala morago dikaedi tsa thuto nngwe le nngwe.



Morutabana o tthalosa setshwantsho a bo a tswelela go tlamela ka tthaloso ya se se tshwanetseng go dirwa.



Setshwantsho sa go bona — Barutwana ba lebelela mafoko.



Setshwantsho sa morutwana sa go kwala — Barutwana ba a kwala.



Setshwantsho sa go bua — Barutwana ba buisa mafoko ba bo ba araba dipotso.



Setshwantsho sa go batlisisa le go bona — Barutwana ba batla mafoko ba bo ba a bona.



Tshasa mebala — Barutwana ba dirisa dipene tsa bona tsa mebalabala bo tshasa mebala.



Setshwantsho sa tiragatso — Setshwantsho se se bontsha tiro ya morutwana.



Setshwantsho sa go opa diatla — Barutwana ba opa diatla ba bo ba bala ka dinomoro.



Setshwantsho sa go tshwaya lebokoso — Barutwana ba tshwaya dikarabo tse ba di fitlheletseng.

Thuto 1 – Tumannngwe

Buka e e diretswe go thusa barutwana ba bogolo jwa dingwaga tse di mo magareng ga tlhano le supa. Go solofetswe gore batsadi le barutabana ba thuse barutwana le go ba tshegetsatsa. Barutwana ba newa tšhono ya go ithuta medumo le tsela ya go bitsa medumo eo. Se se diretswe go thusa barutwana go ithuta go buisa Setswana. Mafoko a mantsi a nokonngwe a a dirisitsweng mo thutong e a fitlhelwa thata mo Beibeleng. Medumo eno e kwadilwe ka ditlhakagolo le ditlhakanye.

Morutabana/Mothusi

Maikaelelo a thuto e ke go ruta medumo ya ditumanosi le ditumammogo. Ruta barutwana medumo e o bo o ba neye nako ya go kwala mafoko mo dibukeng tsa bona. Barutwana ba simolole ka go kwala medumo ka ditlhakanye, ba bo ba di kwala ka ditlhakagolo.

Rulaganya manno a bone go ya ka bogolo jwa dingwaga tsa bona. Ba ba leng banye e bile e le ba ba simololang ba kwale ditumanosi tse: a, e, i, o, u. Barutwana ba boeletse go kwala ditumanosi tse go fitlhela ba tlwaela medumo e.

Thuto 2 – Tumatswako

Fa barutwana kwa dikolong le kwa dikerekeng ba beilwe ka ditlhopa tsa bogolo jwa dingwaga tsa bona, barutabana ba netefatse gore ba kgona go thusana bogolosegolo fa ba dira mafoko a mašwa. Fa ba fetsa go dira thuto ya ntlha e e leng ya nokonngwe, ba tshwanetse go tswela go dira ya nokopedi le ya nokotharo. Se se diriwe go ya ka tsela e e nepagetseng ya go bitsa mafoko ya Setswana. Se se tlaa thusa barutwana go ithuta le go tshwarelela tsela e e nepagetseng ya go bitsa mafoko a Setswana.

Morutabana/Mothusi

Rotloetsa barutwana go kwala dipolelo ba dirisa mafoko a ba fetsang go a ithuta. Se se tlaa go thusa go tlhatlhoba gore a e le ruri ba ithutile le go tlhologanya mafoko ao.

Thuto 3 – Ke a bona

Mo thutong e morutabana o rotloetsa barutwana go thala setshwantsho. Go botlhokwa go totobatsa gore ga go na sethalo se se nepagetseng kgotsa se se sa nepagalang. Dithalo tsothe di botlhokwa ka jalo di tshwanetse go akgoelwa le go itumelelwa. Ba newe tiro eno jaaka tirogae. Go botlhokwa gore o kope tshegetso ya batsadi ba bona fa ba dira tiro e.

Thuto 4 – Tiholego ya Modimo

Barutwana ba rutiwa ka tiholego ya Modimo. Ba supetse ditshwantsho o bo o di bapise le maina a a nyalelanang le tsona. Barutwana ba buise mafoko othe a ba a neilweng ba bo ba simolole go a kwala ba dirisa medumo e ba e ithutileng: Sekao –

nn – monna

ngw – ngwedi

ng – moengele

Thuto 5 – A re rapeleng kgotsa Thapelo ya Morena ya bana

Naya bana tšhono ya go tlhagisa dintlha tse di rapelelwang.

Morutabana/Mothusi

Barutwana ba batle mafoko a a nang le Ss le Yy mo thutong. Morutabana a ba letle go ntsha mafoko a bona ka medumo e e farologaneng.

Thuto 6 – Areka ya ga Noa

Morutabana/Mothusi

Barutwana ba nna le dipuisano ka areka (sekepe) ya ga Noa. Ba letlelele go buisana ka tshosologo. Bangwe ba bona ba ka tswa ba kile ba bona sekepe felo gongwe fa ba bangwe ba ka tswa ba se bone fela mo thelebišeneng kgotsa mo ditshwantshong.

Thuto 7 – Khurumetsa ka morwalela

Morutabana/Mothusi

Barutwana ba akanya le go buisana ka dipologolo tse di farologaneng tsa naga le tsa legae tse ba ka tswang ba kile ba di bona e ka nna ka tlhamalalo kgotsa mo thelebišeneng kgotsa mo dimakasineng. Ba rotloetse go thala setshwantsho sa phologolo nngwe e ba ka ratang go thala setshwantsho sa yona.

Thuto 8 – Pula ya emisa go na

Barutwana ba nne le dipuisano le dingangisano ka mesola le go tlhoka mesola ga pula. Ba bontshe setshwantsho sa molagodimo le mebala e e farologaneng ya ona. Barutwana ba thale molagodimo. Ba kaele go dirisa mebala e mentsintsi ka mo go ka kgonagalang.

Thuto 9 – Go bala

Morutabana/Mothusi

Buisetsa barutwana nomoro o bo o ba bontsha tšhate e e nang le ditshwantsho tse palo ya tsona e lekanang le nomoro e o fetsang go e buisa. Barutwana ba kgone go utlwa tsela ya go bitsa dinomoro tse di buisiwang ke morutabana sentle go utlwala. Go botlhokwa go netefatsa gore barutwana ba bitsa lefoko morago ga gago. Barutwana ba ka nna ba rumisa dinomoro. Se se tlaa letla barutwana go natefelelwa ke thuto.

Thuto 10 – Moše – Lesea mo serotong

Barutwana ba bua ka lesele le le mo serotong. Rotloetsa barutwana go diragatsa motshameko ka se ba se bonang mo setshwantshong le ka botshelo jwa ga Moše.

Thuto 11 – Moše o etelela batho ba gagwe pele

Rotloetsa barutwana go thala sefatlhego se se hutsafetseng le se se itumetseng. Gakologelwa gore ga go na setshwantsho se se siameng le se se sa siamang. Letla barutwana go itlhalosa ka dithalo tsa bona.

Barutwana ba rotloediwe go lebelela dithalo ka bobedi ka tsenelelo ba leke go farologanya ditshwantsho tse pedi ka go tlhagisa ditshwano le dipharologano. Leka go tsenya tlhagafalo mo barutwaneng ka nako ya thuto e.

Thuto 12 – Melao e Lesome

Morutabana/Mothusi

Letla barutwana go rumisa melao e e lesome. Ba diragatse morumo oo go supa fa ba tlhaloganya se ba opelang ka sona. Tlhopho molao fale le fale, o bue mme o ba kope go bua gore molao oo ke wa bokae. Netefatsa gore thuto e e itumedisa ka moo go ka kgonegang.

Thuto 13 – Dafita wa modisa

Barutwana ba buisa kgang ka ga Dafita. Ba batla dinku tsa ga Dafita ka go sala morago mola o o marontho o o yang kwa lesakeng. O ba thuse go bona tsela le gore ba se thule lobota. Barutwana ba tlaa itumelela tirwana eno e le ruri.

Thuto 14 – Dafita o lwantsha mokaloba

Buisetsa kgang ya ga Dafita le Goliathe kwa godimo. Morago ga go reetsa kgang, ba araba dipotso. Ba neye nako e ntsi ya go diragatsa terama ka mesifa le maatla a ga Goliathe. Ba batle mafoko mo sethalong sa malepa a mafoko.

Leka kitso ya bona: Naya barutwana tshedimosetso e e fosagetseng ka ga Goliathe: Goliathe yo monnye a le mosesane, yo o tletseng tlotlo le taolo. Goliathe yo o siameng thata e bile a ratiwa ke batho botlhe. Rotloetsa barutwana go go naya setshwantsho sa motho yo tota Goliathe e neng e le ena jaaka ba buisitse ka gagwe mo Beibeleng.

Tlhatlhobo

Go na le mafoko a a feletseng mo sethalong sa mafoko. Barutwana ba batle mafoko ao mo sethalong sa malepa a mafoko. Se se ka ba tsaya nako e e rileng ka jalo o tlhoka go nna bopelotelele le go ba akanyetsa. O ba akgole ka gale fa ba bone mafoko mo sethalong sa mafoko.

Thuto 15 – Daniele mo mongobong wa ditau

Buisetsa barutwana kgang ka ga Daniele o bo o ba botse dipotso. Ba lebelele ditshwantsho go ba thusa ka dikarabo. Ba kwale mafoko otlhe a a kwadilweng ka marontho mo dibukeng tsa bona tsa ditirwana.

Thuto 16 – Jesu o a tsalwa

Barutwana ba lebelele ka kelotlhoko se se kwadilweng mo ditshwantshong. Ba sekeletse mafoko a ba a bonang mo setshwantshong.

Thuto 17 – Banna ba ba bothale ba tla ka dineo

Barutwana ba buisane ka dineo tse banna ba ba bothale ba di tlisitseng mo go Jesu:

Gouta

Maswalo

Mera

Rotloetsa barutwana go botsa batsadi ba bona gore maswalo le mera ke eng.

Thuto 18 – Ditshwantsho tsa botsalo jwa ga Jesu

Leka kitso ya gago:

Dirisa tšhate ya ditshwantsho le mafoko. Barutwana ba bapise mafoko le ditshwantsho tse di maleba.

O ba letle go thusana gore ba itumelele thuto.

Thuto 19 – Herote o batla go bolaya Jesu

Dirisa setshwantsho go thusa barutwana go isa Jesu kwa Egepeto.

Thuto 20 – Jesu o dira tiro ya Modimo

Jesu o rata batho botlhe. Rotloetsa barutwana go buisana gore Jesu o ba rata go le go kana kang.

Ba kwale polelo e: Jesu o a nthata. Ba rofosane dibuka ba leke go tlhatlhobana ditiro.

Thuto 21 – Jesu o re ruta go rapela

Rotloetsa barutwana gore ba rate go rapela jaaka Dafita. Barutwana ba ithute thapelo e ka tlhogo. Ba rute thapelo ya Morena, “Rara wa rona yo o kwa legodimong”.

Thuto 22 – Jesu o a tsamaya

Buisa ka itletlo kgang ya loso lwa ga Jesu. Ba botse dipotso tse di jaaka:

1. Jesu o swetse kae?
2. A mmele wa ga Jesu o santse o fitlhilwe mo lebitleng?
3. Jesu o tsogile mo baswing morago ga malatsi a le kae?
4. Jesu o ile legodimong jang?

Barutwana ba thale setshwantsho sa sefapaano.

Thuto 23 – Go opela

Botsa barutwana dipotso ka pina e:

1. Pina e bua ka ga eng?
2. Pina e re ruta eng?

Morutabana/Mothusi

- Rotloetsa barutwana go opela pina e ba dirisa morumo wa “Fika ja bosakhutleng”. Ba opelele pina e gore ba utlwe gore e opelwa jang.
- Buisanang ka botlhokwa le bontle jwa thuto. Netefatsa gore barutwana botlhe ba bona tšhono ya go bua. Gakologelwa gore ga o batlane le dikarabo tse di nepagetseng. Ke puisano fela e mo go yona barutwana ba tlhagisang dikakanyo tsa bona.